

Nos Antepasadonan...

Ma Mona

Maria Dominica Giel-Tromp-Wolff-Roza-Bazar, esey tabata e nomber di "Ma Mona" kende tabata partera y curioso conocí na nos isla.

E tabata juda hopi hende cu tabata bin pa nan mes of pa nan jiunan chikito cerca dje. Nan no tabata bin di eybanda mes, sino for di Playa, Savaneta y hasta San Nicolas. Mamanan cu tabata sperando baby, tabata laga Ma Mona check si e jiu ta den bon posision y na momento di parto e tabata bai judanan haya e jiu. El a siña esaki for di su wela Faustina, cu tambe tabata partera.

Di chikito Monica, manera nan tabata jam'é, tabata rond di su wela, e tabata mira y tende tur


cos. Un mucha masha spiertu y Faustina, cu tabata stim'é masha hopi, tabata lag'é juda. Asina Ma Mona a bin siña tambe con ta hala hende ora p.e. un braza sali for di lugar of un enkel verzwik. Dolor di 'band' (barica) y otro dolornan e ta djies pasa man y resa un oracion cu Faustina a siñ'é.

E tabata huma mucha pa kkita 'hoyada' ora cu mal wowo mir'é. E tabata cura dolor di garganta of manera nan tabata jam'é antes 'lanta campana cu a cai'. Pero su specialidad tabata saca naño for di wowo. Hasta tempo el a bira ciego e tabata saca sushi for di wowo cu su lenga.

Maria Dominica Giel a nace dia 4 di Mei 1885, e tabata jiu di Hose Tromp y Jette Giel. Su mayornan tabata casá pa misa só, p'esey pa gobierno e no por carga Tromp.

Dia 26 di januari 1900 - cu solamente 15 aña - el a casa cu Louis Wolff. Despues cu esaki a muri, Monica a bai traha na Curaçao y dia 25 di Februari 1904 el a casa atrobe cu Felix Herman Roza-Bazar.

Ma Mona tabata tin 4 jiu, di cual e 2 prome nan a muri hopi jong. Na mucha e tabata biba na Montaña y na grandi el a bai biba na Boegoeroëi, caminda el a fayece dia 2 di September 1974, na edad di 89 aña.





Chabalito

Number 5 - Año IV
Januari, 2002 - Afl. 2,=

